

XI

Lai sgonde piaînnatte était haibitèe poi ïn braigou (*vaniteux*) :

- Ah ! Ah ! Voili l' envèllie (*visite*) d' ïn aidmirou ! s' écriyé dâs bîn loin lo braigou dâs qu' èl é vu lo ptét pŕince.

Poéchque, po les braigous, les âtres hannes sont des aidmirous.

- Bondjoué, dié lo ptét pŕince. Vos èz ïn soûtche de tchaipé.

- Ç' ât po saluaie, yi réponjé lo braigou. Ç' ât po saluaie tiaind qu' an m' aippiâdgie.

Mâlhèyrouj' ment é n' pése djemais niun poi chi.

- Ah aîye ? dié lo ptét pŕince que n' comprenié pe.

- Fris tes mains yènne contre l' âtre, rremaindé aidonc lo braigou.

Lo ptét pŕince é fri ses mains yènne contre l' âtre. L' braigou salué moudèchtement en soyevait son tchaipé.

- Çoli, ç' ât pus aimusaint que l' envèllie (*visite*) â roi, se dié en lu-meinme lo ptét pŕince. Èt è rècmencé de fri ses mains yènne contre l' âtre. L' braigou rècmencé de saluaie en soyevait son tchaipé.

Aiprés cîntyte menutes d' èjèrchiche lo ptét pŕince feut sôle d' lai yuni-sînnie (*monotonie*) di djû :

- Èt, po qu' lo tchaipé tchoéyeuche, qu' è dmaindé, qu' ât-ce qu' è fât faire ?

- Mains l' braigou ne l' oûyé pe. Les braigous n' oûyant que les éleudges.

- Ât-ce que te m' aidmires vrâment brâment ? qu' è dmaindé â ptét pŕince ?

- Qu' ât-ce que seinche (*signifie*) aidmiraie ?

- Aidmiraie seinche recoégnâtre qu' i seus l' hanne lo pus bé, lo meus véti, lo pus rétche èt lo pus ailuè (*intelligent*) d' lai piaînnatte.

- Mains t' és tot d' pai toi tchu tai piaînnatte !

- Faîs-me ci piaîji. Aidmire-me tot d' meinme !

- I t' aidmire, dié lo ptét pŕince, en éy'vaint ïn pô les épâles, mains en quoi qu' çoli t' peus ïntèrèchie ?

Èt lo ptét pŕince s'en allé.

Les grantes dgens sont déchidément bîn churpregnainnes, qu' è s' dié en lu-meinme di temps d' son voiyaidge.